



牛角掛書，實現自家

一年一回個全國語文競賽又到位，逐年個12月初對各地來個選手又討來拚輸贏，比哪儕較厲害。有個縣市早即對9月份辦市、縣賽擇出選手，積極栽培。聘請專家來指導這兜選手做頭好個準備。今年個競賽係得臺中市主辦，明年換雲林縣接手。逐個主辦縣市早幾年前即量早在做準備，派人學習仰子辦活動，十分用心，討得參賽者留落頭好個印象。

人生短短，一下即過去。替自家留一兜好個回想，勇敢向自家挑戰。參加客事演講抑係朗讀比賽完成實現自家，若無即栽培序細來比賽。這兜攏係十分得人感動和佩服。就像真多評判先生講個，敢企起臺嶼，即係贏。頭要緊係過程，無論係普通時個準備，抑係比賽個緊張，這兜攏得個人成長嘛學著真多。

演講係愛表演嘛愛講，頭會用考驗出一個人個臨場反應和普通時本身生活經驗、讀書個闊度和深度，對社會、對教育、對環境個關心和觀察個敏銳。嘛考驗著對母語、對客事諺語個熟事度。正經係真高難度個自家挑戰。朗讀更加係情意個表現，定著普通時愛有十足個訓練和積極個準備正毋會驚場，拗文章個內容情感、意境表達出來感染別儕。無論係演講抑係朗讀，頭要緊個即愛表現真實個感情，定著毋會用怪聲怪調抑係動作過頭大。

逐年個全國語文競賽，得俚感受真大。回想自家自國小到大學，單單參加過一回個國語演講比賽，攞來即毋識比過。毋過一想著客事即討斷去，心肝底個擘心和使命感得俚變勇敢。所以連4年攏參加全國語文競賽個客事演講比賽。在遐個所在，聽著評審講：「總算有聽著詔安客事囉」，和參賽朋友個驚奇。得俚感覺俚定著愛拗詔安客事多多講出去，得人知有「四海大平安」個客事。攞拗牛角掛書個精神提出來，完成實現自家個理想。

作者：李秉璋

☆詞彙學習☆

【牛角掛書】ngiu` goo` gua` shi`：隋朝時李密掛漢書于牛角，騎在牛背上邊走邊讀。

【序細】si se`：晚輩，小孩子。而長輩或父母則叫「序大人」。

【評判】pin` pan`：比賽時的評審、裁判。

【實現自家】shid` hien zi` ga`：自我實現。

【熟事】shiu su：熟識。在此處為熟悉之意。

【心肝底】sim` gon` de`：內心。

【四海大平安】：指的是目前臺灣使用中客語的五大種類。即四縣腔、海陸腔、大埔腔、饒平腔、詔安腔等五種客家話。

【拚輸贏】biang` shi` rhiang`：參加比賽，看誰輸誰贏。